

Reglur um styrki til að breyta húsnæði vegna fötlunar barna

Markmið

1. gr.

Markmið reglna þessara er að auðvelda breytingar á húsnæði þannig að það henti til lengri tíma þörfum barns með fötlun, sem þar býr. Breytingin skal miða að því að barnið verði eins sjálfbjarga og kostur er á heimili sínu og aðstæður umönnunaraðila verði sem bestar.

Búsetuskilyrði og forsjá barns

2. gr.

Forsenda þess að geta sótt um styrk skv. reglum þessum er að umsækjandi sé forráðamaður barns og að barn eigi lögheimili í Akureyrarkaupstað, þ.e. á Akureyri, í Hrísey eða Grímsey.

3. gr.

Þeir einir geta sótt um styrk sem eru með barn yngra en 18 ára á framfæri sínu og fötlun þess kallar á breytingar á húsnæðinu þannig að það henti betur til lengri tíma.

Umsókn

4. gr.

Hægt er að sækja um styrk til breytinga á jafnt nýju sem eldra húsnæði, þannig að það henti betur þörfum barns.

5. gr.

Sótt er um styrk skv. reglum þessum á eyðublaði um styrk til að breyta húsnæði vegna fötlunar barns sem skal skila til fjölskyldudeildar Akureyrarkaupstaðar.

Í umsókninni þurfa að koma fram upplýsingar um umsækjanda, m.a. lögheimili, persónulegar aðstæður og farniskerðingu, þær breytingar sem óskað er eftir að verði gerðar, kostnaðaráætlun og annað sem máli skiptir varðandi umsóknina. Mikilvægt er að allar umbeðnar upplýsingar komi fram á umsókn svo ekki komi til seinkunar á afgreiðslu hennar. Hægt er að óska eftir læknisvottorði eða greinargerð frá fagaðila þyki ástæða til.

Málsmeðferð

6. gr.

Innan tveggja vikna frá því að umsókn berst skal ráðgjafi hitta umsækjendur og fara yfir umsóknina og hefja mat á þörf fyrir breytingar. Við matið er litið til húsnæðis og hvernig best er að breyta því þannig að það mæti þörfum barnsins sem best. Tekið er mið af fötlun barns og hvaða þörf er á breytingum þannig að barnið verði sem mest sjálfbjarga á heimili sínu og aðstæður umönnunaraðila verði sem bestar. Við matið er kallað eftir upplýsingum frá fagaðilum sem þekkja til barnsins og þarfa þess. Leitað er til fagaðila með sérþekkingu á aðgengismálum fyrir fatlaða til að fá faglegar leiðbeiningar um hvernig best sé að breyta húsnæðinu þannig að þær uppfylli tilgang reglna þessara.

7. gr.

Þriggja manna matshópur, skipaður af framkvæmdastjórum búsetudeildar og fjölskyldudeildar, skal meta umsóknir og taka ákvörðun um styrkveitingu.

8. gr.

Áður en endanleg ákvörðun um styrkveitingu er tekin skal liggja fyrir samþykki skipulagsstjóra Akureyrarkaupstaðar og tryggt að sótt hafi verið um nauðsynleg leyfi til breytinga samkvæmt niðurstöðu matsins.

9. gr.

Breytingar skulu gerðar á sem hagkvæmastan hátt. Hægt er að vísa umsókn frá ef í ljós kemur að barnið geti orðið jafn vel eða betur sjálfbjarga á heimili sínum með réttum hjálpartækjum. Í þeim tilfellum skulu foreldrar aðstoðaðir við að sækja um viðeigandi hjálpartæki.

Fjárhæð styrks

10. gr.

Styrkupp hæð fer eftir fjárveitingum hverju sinni og er að hámarki 30% af útlögðum kostnaði við breytingarnar, samkvæmt framlögðum reikningum en þó aldrei hærra en kr. 750.000, að teknu tilliti til endurgreiðslu á virðisaukaskatti. Styrkir eru ekki greiddir út fyrir en framkvæmdum er lokið og endanlegur kostnaður liggur fyrir.

Málskot

11. gr.

Telji umsækjandi á rétt sinn hallað við afgreiðslu umsóknar skv. reglum þessum er honum heimilt að vísa ákvörðun matshópsins um afgreiðslu umsóknar til félagsmálaráðs innan fjögurra vikna frá því honum barst vitneskja um ákvörðun. Félagsmálaráð skal fjalla um umsókn og taka ákvörðun svo fljótt sem unnt er.

Endurupptaka

12. gr.

Umsækjandi getur óskað þess að umsókn sé tekin til meðferðar á ný ef afgreiðsla matshópsins á umsókninni hefur byggst á ófullnægjandi eða röngum upplýsingum um málsatvik eða ákvörðun hefur byggst á atvikum sem breyst hafa verulega frá því að ákvörðun var tekin. Beiðni um endurupptöku skal beina til bæjarráðs innan 3ja mánaða frá birtingu ákvörðunar. Meti bæjarráð að lagaleg skilyrði endurupptöku séu fyrir hendi, er erindi um endurupptöku vísað til félagsmálaráðs til málsmeðferðar. Efnisatriði máls skulu ekki lögð fyrir bæjarráð.

Gildistaka

13. gr.

Reglur þessar taka gildi frá og með 1. júní 2011.

Ákvæði til bráðabirgða

Þrátt fyrir gildistöku tíma er heimilt á árinu 2011 að sækja um styrk vegna kostnaðar sem féll til á árinu 2010.

Samþykkt í félagsmálaráði 11. maí 2011

Samþykkt í bæjarstjórn 7. júní 2011